

廟學典禮



詳校官監察御史_臣劉芬

編修_臣程嘉謨覆勘

膳錄舉人臣范翔集

膳錄監生臣俞錫玉

欽定四庫全書

廟學典禮卷五

行臺坐下憲司講究學校便宜

行御史臺元貞元年六月劄付該據福建閩海道肅政廉訪司申照得立提刑按察司欽奉聖旨條畫內一款節該所至之處勸課農桑問民疾苦勉勵學校宣明教化欽此詔書內一款學校之設所以作成人材仰各處正官教官欽依先皇帝已降聖旨主領敦勸嚴加訓誨

務要成材以備擢用仍仰中書省議行貢舉之法其無
學田去處量撥荒閒地土給贍生徒所在官司常與存
恤欽此除欽依外方今朝廷清明崇重儒術然獎諭之
文雖篤而教育之方未備平居學校既無素定之規他
時貢舉豈有超羣之士擬合明立教條使之日就月將
庶幾養成材器以待選掄為此畧舉到合行數件判送
福建道儒學提舉司詳細講究連呈去後回申集到福
州路儒學教授熊朋來并學正學錄人等講究到逐項

事理誠恐中間所擬未應繳連到元奉判送申乞照詳
事得此省會福建道儒學提舉司照依所據事理依上
施行如委於學校有所裨益堪以為例遍行開具保結
申司去後未到間九月十六日承奉行御史臺劄付該
准御史臺咨奏准頒降聖旨節該孔子曲阜林廟上都
大都諸路府州縣邑應設廟學書院本路總管府提舉
儒學肅政廉訪司宣明教化勉勵學校作養人材及禁
約諸人毋得沮擾等事及有差來官齋擎御寶聖旨到

來開讀訖恭迎前去福建道廟學欽領安奉外今據儒學提舉司申遵依將講究到學校逐項合行事理依上施行委於學校有所裨益堪以爲例若蒙通行各路一體施行吾道幸甚保結申乞照詳事得此卑司開坐申乞照詳施行得此行下江東建康道肅政廉訪司行移本道儒學提舉司更爲講究擬定申去後今據回申行據提舉司申會集守司建康路儒學教授山長正錄教諭各各職事人等依上講究得與本道學校見行教養

大畧相同似此規繩依上施行俱各相應保結乞照驗
施行得此申乞照驗事憲臺除外合下仰照驗行移所屬
儒學一體施行承此除外合下仰照驗遍下合屬儒學
依奉臺劄內事理施行先具依准文狀申來 一肄業
儒生朔望並須詣學陪拜聽講如無假故不到者仰學
官檢舉議罰前件議得在籍儒人凡遇朔望不犯紅日
並須詣學親筆書名陪拜聽講雍容就列不得誼譁如
有事故者先期具狀經教官給假附簿以憑稽考或未

經請假妄稱事故而不赴學者從舉事檢舉具呈教官依例行罰徵到鈔數委令司罰置簿收掌以助修學或充課賞一每月課試之法合照舊例計其分數逐月載籍終歲考其優劣以定殿最其十二試俱黜者降供積及十分者春秋二季教官申請本路文資正官詣學有廉訪司官處同到集諸生簾引籍其高下以備歲貢前件議得儒人課試擬每月從教官出題或賦論經義史評之類在籍諸生各供本經全篇每五卷約取一名照舊例魁

名三分亞名二分又次名一分半通榜者各一分教官
考校逐月載籍歲終計其分數以考優劣如十二試積
及十分者次年正月內從教官申請本路文資正官廉
訪司官詣學集及分儒生簾引文義通暢者取首名保
申上司以備歲貢其餘籍記姓名所有十二試俱黜者
降供一季發付本學訓誨逐日在齋習讀伺降供滿日
再行引試中格許令回參其連三月不試者從教官議
罰一朔望講書除職事合選述講議登堂講說外其

諸生並無講說今後合預先出題置立籤筒遍寫該講
生員名姓臨時掣籤背講二次文理不通者降供前件
議得儒學除教官正錄前廊耆舊朔望輪次講說外三
十歲以下十五歲以上儒生常川在學肄業每月朔日
教官預先出題三章揭示廊廡聽其講究精熟置之籤
筒遍寫該講生員名姓至本月望日伺登堂聽講畢請
教官臨時掣籤引至案前對衆將朔日題目講說三次
文理不通者擬降供一季發付本學教導訓誨再行習

讀同降供滿日引上覆念講說文理通者許令回叅不
通者從學官議罰其係籍儒人不依例赴學供講陪拜
生員於內多有恃賴見充行省廉訪司總管府典吏貼
書學校似難約束許教官具姓申廉訪司經歷司照驗
區處各路總管府照驗施行 一在學行供執事生員
每日講書會課須當立定成規前件議得在學儒人除
前廊耆舊皆亡宋登科貢舍之人逐月朔望輪次講書
外東西序耆儒內請每日登堂講通鑑一章然後會食

儒生五十歲以下者各供月課孟月經賦仲月論俱各
全篇季月經疑史評其三十歲以下者各各坐齋讀書
延請講書訓誨日各習所業或雜文論冒小經義唐律
詩之類期以成材十五歲以下者設小學一所教導二
員逐日依小學規式教導施行 一設立小學照依已
行事理施行坐次師席居中左右以次設書卓以右為上諸
生序齒兩兩相對直日設坐師席南兩端鐘設於師席
右名牌設於師席左直日所掌諸物直日名牌上書直日輪次

名姓用畢
紙糊復書

鐘籤筒硯水餅手牌

上書安
詳恭敬

箕帚書卓香爐

界方火鑪諸生所說書名牌

人名以上書姓名諸
生至各認名依次掛

直日

所掌諸事清晨灑掃溫誦舊書專監視諸生不如法者

舉之諸生晨參講書會食習字呈押試書暮歸並鳴鐘

喝揖諸生所講讀書合用朱文公小學書為先次及孝

經論語早晨合先講小學書午後隨長幼敏鈍分授他

書孝經合用文公刊誤本語孟用文公集注詩書用文

公集傳訂定傳本講說諸生所習字合用唐顏尚書字

樣寫大小兩樣諸生逐日儀式晨叅清晨諸生畢至師
就坐直日鳴鐘一聲諸生以次出門外序立第二聲諸
生以次自正門東方入北面上重行立第三聲喝揖諸
生齊揖班首自西折旋至師前進三步拱手問先生安
否師云如常復退三步揖折旋入本位直日喝圓揖諸生圓
揖喝就位諸生各就位中有兄弟叔姪同學候就位後卑幼者就尊揖講書直日
與侍立各一人以小學書及籤筒置於書桌昇於堂中諸
生北面重行立鳴鐘一聲喝諸生齊揖拱立初開講日

師先講小學書第一章次日諸生齊揖畢侍立取籤置
師前卓上呼其上姓名聞呼者出班自東方折旋入本
位或抽三四籤惟師意畢師復講授第二章講畢鳴鐘
喝揖諸生齊揖畢喝復位諸生各就位誦書諸生就坐
誦所授書或未通曉起立拱手問師再說或齋長先通
師令巡問諸生通否務要熟講精思毋得率畧會食早
食至直日鳴鐘喝揖諸生齊揖就食毋得語言咳唾伺
食俱畢喝揖齊揖以次退就庭中以序行步務為舒徐